

Adrès:
Stadsuitbreiding
Kralendijk
Tel. 717-8482
Fax 717-4690
P.O.Box 127
E-mail: extrabon@telbonet.an
Website: www.extrabon.com



Djaweps, 1 di novèmber 2007 | E korant di Pueblo Boneriano ~ Preis fls. 1,25

Frakshon di Demokrat a bishitá 'área di desaster' den Amboina

PELIGER PA KOMUNIDAT

Diariamente ta dañá un teritorio grandi di Boneiru



Si kualké hende mira e foto aki, nan lo pensa ku ta trata di un bunita roi na kualké sitio den naturalesa boneriano. Aparensia sinembargo ta gaña, pasobra esaki ta un kanal ku awa sushi, yen di kímiko i otro ingredientenan peligroso pa salú di hende, ku trùknan ta bai basha diariamente riba tereno di LVV na Amboina, djis pegá ku e barío di kas di pueblo Amboina. Habitantenan di e barío aki tin hopi molèster di muska i holó stinki ku ta bini for di e kanalnan aki. Ayera miembronan di frakshon di Demokrat a bai pone nan mes na altura di e situashon tristu i lamentabel aki.

BAN BÈK FÁBRIKA TEKSTILERO (3)

Na kuminsamentu di aña 1948 un fabrikante di paña di Heerlen, Hulanda, a disidí di kuminsá ku un fábrika di paña di bisti na Boneiru, segun e sistema konosí na Hulandes komo 'confectie kleding'. Nòmber di e persona aki tabata Peter Schunck.

E famia Schunck te awe ta embolbí den industria tekstilero na e siudat Heerlen. Durante Segundo Guera Mundial e famia aki tabata kose paña tambe pa personanan ku tabata bringa kontra e Alemannan ku a okupá Hulanda, segun por lesa den e buki 'Het Verborgen Front'.

No ta sin mas Peter Schunck a skohe Boneiru pa establese un fábrika tekstilero. Promé ku el a yega Boneiru e persona aki a orientá su mes tambe na Kòrsou i Aruba pa wak kua tabata e posibilidatnan aya. E motibu ku el a skohe Boneiru tabata ku riba e isla aki tabatin mas mucha muhé disponibel komo forsa laboral pa traha den un fábrika asina.

Peter J.A. Schunck a lanta e kompania N.V. Schuncks Kleding-Industrie Bonaire. Dia 17 di ougùstùs 1948 Gobernador Ir. Leonard A. Peters (1949-1951) a hasi apertura ofisial di e fábrika aki.

E fábrika a kuminsá operá den un edifisio di tabla situá den e aktual Kaya Prinses Marie na Playa. E tablanan pa a traha e edifisio aki tabata prosedente di e kampamentu di militanan merikano ku tabatin durante Segundo Guera Mundial den besindario di Tanki Maraka, Tra'i Montaña.

Establesimentu di e fábrika grandi aki pa Boneiru tabata determinante den un desishon ku gobièrnu a tuma pa drecha e produkshon di koriente riba e isla aki, ku te na e momentu ei tabata hopi deficiente. Schunck a pone esaki komo kondishon pa e establese su fábrika tekstilero.

CityShop
Plazma Tv

Digitally yours

16 buelo diario entre
Kòrsou i Boneiru

**DIVI DIVI
AIR**

Reservashon 24 ora na
telefon 839-1515 / 563-1913

MIO

Situá awor na
Kaya Andres
Emerenciana
pegá ku
China Nobo.

"CHES P'E KABES"
Desishon

Si nos por enfrentá sintimentunan no-plasentero ku kwidow, afikshon i sin-violensia, nos lo por transformá esakinan den energia salú i nutriente pa nos mes. Pa medio di opservashon ku un mente habrí, sintimentunan no-plasentero por sirbi di ta un guia pa nos, i ta duna nos bista i kompreshon pa nos mes, i esnan ku ta rondoná nos. Awe, bisa bo mes: Mi tin kompreshon pa otronan, i ta dispuesto pa adaptá na e ritmo di tempu. Esaki, semper ku guia di Spiritu Santu.

www.lemonique.net

Frakshon di Demokrat a bishitá 'área di desaster' den Amboina

PELIGER PA KOMUNIDAT

Diariamente ta dañá un teritorio grandi di Boneiru

KRALENDIJK – Gobièrnu di Boneiru ta pèrmitiendo pa añanan kaba pa dañá un parti grandi di e tereno di Amboina, dor di laga trùknan basha awa sushi prosedente di berpùt i tambe di e barku Freewinds, den e área aki. Ayera mainta frakshon di Partido Demokrátiko Boneriano, huntu ku e siudadano Sean Paton, a bai e sitio aki pa personalmente mira e situashon. Reporteronan di Extra tambe tabata na e sitio aki, ku sin duda por kalifiká komo un 'área di desaster', no solamente pa loke ta trata medio ambiente, sino tambe pa salú di hende. Pues un peliger pa komunidad.

Sean Paton a kuminsá kuestioná e asunto aki via di Green Peace International. El a produsí algun video hopi bon, ku por haña riba www.youtube.com, riba kua por mira kon serio e situashon ta. Anke ku Sean Paton a muestra na promé instante riba e awa ku ta pòm

ora ku e barku Freewinds ta den haf di Boneiru, no ta awa sushi di e barku aki so ta bai riba e tereno na Amboina.

Promé tabata basha awa sushi prosedente di berpùt den laman na altura di Piedra Krus. Un sierto momentu sin embargo a surgi un epidemia di kólera na entre otro Venezuela i a sali instrukshon pa no hasi esaki mas, komo ku piskánan ku hende kome por sirbi komo un medio pa plama e enfermedat kontagioso aki.

Tur instansia di salubridat i higiena na Boneiru a bai di akuerdo e tempu ei ku un proposishon di Ben Oleana, direktor di Selibon, pa a usa landfill pa deshasí di e awa sushi aki.

E bashamentu di awa sushi den Amboina a kuminsá masomenos 6 pa 7 aña pasá, despues ku Partido Demokrátiko a pèrdè elekshon. Promé ku esaki tabata basha e awa aki na landfill, ku na momentu ku

a krea e fasilidat aki, tabata situá hopi alehá. Pero tin hende a kuminsá traha kas despues pabou di landfill i nan a kuminsá ta reklamá presensia di muska i holó stinki kousá pa awa sushi.

UPB, ku tabata den oposishon, a hunga polítika ku e asunto aki i despues ku nan a asumí responsabilidat di gobernashon a trese "solushon", den sentido ku a disidí pa laga e trùknan bai basha awa sushi den Amboina i tambe riba e tereno di kunuku Warahama di Ramonsito Booi, pa asina usa e awa aki den irigashon.

Te ainda Selibon ta basha awa sushi na Warahama, pero ta trata aki di e awa di 'bon kalidat', esun no dañino pa salú di hende i medio ambiente. E awa sushi pisá mes, konteniendo kímikonan peligroso i venenoso, pa añanan kaba ta bai riba tereno di Amboina, pegá ku e instalashonnan di LVV.

Loke por ripará awor ta ku bashamentu di e awa sushi aki ta sosodé na un distansia masha chikitu for di e bario di kas di pueblo Amboina, loke ta motibu di hopi malkontentu den e bario konserní. Na hopi okashon kaba habitantenan di e bario aki a sali dilanti pa muestra nan disgustu pa plakanan di muska, debí na presensia di e tereno na unda ta basha e awa aki.

Hopi serio e situashon a bira na momentu ku a bin ripará ku e awa prosedente di

Freewinds ta kontené kímikonan peligroso i ku ta hopi dañino pa medio ambiente. No esei so. Freewinds ta usa awa sali tambe den su tuberia pa flùsh WC, di manera pues ku pokopoko salu ta dañando tambe e tera den Amboina.

Sean Paton a splika ayera mainta na miembronan di frakshon di Partido Demokrátiko Boneriano ku e motibu ku el a produsí e video di loke ta sosodiendo na Amboina, ta pa alertá tur hende, tambe komunidad internashonal, ku algu asina no ta permisibel. E konsekuensianan pa Boneiru por ta hopi serio. E kímikonan aki ta penetrá bai den tera i hasi daño tambe na awa di pos, ku bestia i hende por bebe, ku tur konsekuensia embolbí.

Mientrastantu Sean Paton a kuminsá hasi e trámitenan pa e kompania Progressive Environmental Solutions hasi tèst e awa di Freewinds ku ta basha den e kanalnan riba tereno di Amboina. Naturalmente Environmental Solutions mester haña pèrmit pa kue muestra di

e awa aki i p'esei tambe nan a hasi petishon na Diputado Anthony Nicolaas, den su kalidat di presidente komisario di Selibon N.V.

Na vários sitio riba e tereno di Amboina por topa tambe ku zeta ku Selibon mes a basha den e área aki, loke a hasi daño enorme na e tereno. Por mira kla ku e zeta aki, kombiná ku otro líkido, ta brui i produsí gas peligroso.

Sean Paton a splika ku tur hende ta komprondé ku mester di un manera pa deshasí di awa sushi, komo ku un echo ta ku komunidad ta produsí esaki. Pero importante ta pa manehá e awa aki bon, entre otro konstruyendo bakinan spesial den kua por trata e awa aki, spesialmente esun den kua tin kímiko peligroso, manera esun prosedente di Freewinds.

Ta bon pa splika ku e trùk ku ta transportá e awa di Freewinds pa e tereno na Amboina no tin niun falta den e asunto aki. Te asta por bisa ku Freewinds tampoko tin falta, pasobra nan mester deshasí di nan awa sushi un kaminda.

